

ՍԻՍԱՋԱՆ ԵՎ ՆԱԽԿՈՐՁԱՆ ՔԱՂԱՔՆԵՐԻ ՏԵՂԱԴՐՈՒԹՅՈՒՆԸ

ԱՂՂԱՐԱԳՅՈՁՅԱՆ

Սիսաջան - Արարական աղբյուրներում ուշագրավ տեղեկություններ են պահպանվել Սիսաջան (իմա՝ Սիսական) քաղաքի մասին: Յակուտ ալ-Համազին հաղորդում է, որ արաբական բանակը՝ Հաբիբ իբն-Մասլամայի գլխավորությամբ, Հայաստան կատարած արշավանքի ժամանակ գրավեց Սիսաջան քաղաքը, որը գտնվում էր Դվինից 16 փարսախ հեռավորության վրա: Քաղաքի բնակիչները հաշտություն խնդրեցին և պարտավորվեցին հարկ վճարել խալիֆ Օթման իբն-Աֆանին¹:

Իբն-Հաուկալը հայտնում է, որ «Սիսաջանը միջին մեծության հաճելի քաղաք է, Սիսաջանից Դաբիլ՝ 16 փարսախ է»²: Ալ-Իսթահրու աշխարհագրական երկում Սիսաջան է կոչվում Պարտավ-Դվին մայրուղու կայաններից մեկը. «Բերդաայից Կալկատուն՝ 9 փարսախ, Կալկատունից Մետրիա՝ 13, Մետրիսից Դավմիս՝ 12, Դավմիսից Կիլ-կուլ՝ 16, Կիլ-կուլից Սիսաջան՝ 16 և Սիսաջանից Դաբիլ՝ 16 փարսախ»³:

Արաբ այլ հեղինակներ (իբն-Խորդադրեն, Կուդամա, ալ-Մուքադասի) կայանների միջև եղած հեռավորությունը տալիս են անցումներով⁴:

Հուդուզ ալ-Ալամի հեղինակը գրում է. «Սիսական (իմա՝ Սիսաջան) քաղաք է, որն ունի մեծ մարզ և Սմբատի թագավորությունն է»⁵:

Բերված տեղեկություններից երևում է, որ Սիսաջանի նույնացումը Սյունիքի Մղակք գավառի տարածքում գտնվող Սիսական (Վաստակաշատ, Վասակակերտ)⁶ բերդաքաղաքի հետ բացառվում է, քանի որ դա հակասում է արաբական աղբյուրների տվյալներին: Տվյալ դեպքում խոսքը մի քաղաքի մասին է, որ տեղադրված էր Պարտավից դեպի Դվին տանող ճանապարհին: Այդ մայրուղու ուղղության, դրա կայանների տեղադրության և անվանումների ծագման մասին կան մի քանի տեսակետներ: Ըստ Յ.Մարկվարտի, Սիսաջան և Գեղաքունի կայանները գտնվել են համանուն գավառների մուտքի մոտ և այդ պատճառով կոչվել են նրանց անուններով: Հեղինակի կարծիքով, կայանների հաջորդականությունը խախտված է: Նա գտնում է, որ Դվինից հետո առաջինը եղել է Գեղաքունին, այնուհետև՝ Սիսաջանը: Յո.Մարկվարտը որոշել է ուղին՝ անցկացնելով Սևանա լճի ափով:

¹ Արարական աղբյուրները Հայաստանի և հարևան երկրների մասին, կազմեց՝ Հ.Թ.Նալբանդյան, Ե., 1965, էջ 92:

² Свод ение арабских географов IX – X веков по р. Хр. О Кавказе, Армении и Азербайджане – Сборник материалов для описания местностей и племен Кавказа (այսուհետև՝ СМОМПК), Тифлис, 1908, вып. XXXVIII, с. 101 – 102.

³ СМОМПК, Тифлис, 1901, вып. XXIX, с. 33.

⁴ СМОМПК, Тифлис, 1903, вып. XXXII, с. 11, 29, вып. XXXVIII, с. 12.

⁵ Հ. Փափազյան, Անանուն տալիկ աշխարհագիրը Հայաստանի, Ադրբեջանի և Արևելյան Վրաստանի աշխարհագրության և տնտեսական հարաբերությունների մասին (ՀԱՍՏԻ Գա Տեղեկագիր Հաս./գիտ., 1953, № 5, էջ 79):

⁶ Ա. Ղարաբյուրյան, Վասակաշատի տեղադրությունը [Գատմա-բանասիրական հանդես (այսուհետև՝ ՊԲՀ), 1986, № 2, էջ 238 – 241]:

Գեղաքունին տեղադրել է Դվինից 16 փարսախ, իսկ Սիսաջանը՝ դրանից նույնքան հեռավորության վրա :

Հ.Մանանդյանը անընդունելի է համարում Յո.Մարկվարտի՝ տեսակետը: Գիտնականի համոզմամբ, ճանապարհի ուղղության հարցում իրավացի է Ն.Կարաույովը, որի կողմից Սիսաջանի նույնացումը Կիսաջանի հետ Հ.Մանանդյանը համարել է առավել նախընտրելի: Հ.Մանանդյանի եզրահանգմամբ, նույնիսկ այդ վարկածը անընդունելի լինելու դեպքում, ակնհայտ է, որ Սիսաջանը գտնվել է Բաշ-Նորաշեն-Առփա հատվածում՝ Շարուրից Վայոց ձոր տանող ճանապարհին: Նա Սիսաջան անունը կապում է Սյունիքի Սիսական անվան հետ :

Հ.Փափազյանի կարծիքով, Սիսական քաղաքը «գտնվել է մոտավորապես այժմյան Բաշնորաշենի մոտ՝ Նախիջևանի ԱՍՍՌ» :

Թ.Հակոբյանը Սիսաջանի տեղորոշման հարցում նախապատվությունը տալիս է Յո.Մարկվարտի տեսակետին: Նրա կարծիքով, այդ անվանումը առաջացած պետք է լինի այն իրողությունից, որ տրված կետերում մայրուղիները հատող երկրորդական ճանապարհները տանում էին դեպի համանուն գավառները: Թ.Հակոբյանը ենթադրաբար Սիսաջանը տեղադրում է այժմյան Արենի գյուղի տեղում, որն ըստ նրա, միաժամանակ եղել է գլխավոր ճանապարհի վրա գտնվող կայան : Վայոց ձորի տեղանքի ուսումնասիրությունը Բ.Հարությունյանին բերել է այն եզրակացության, որ Սիսաջանը «նհրաժեշտ է փնտրել Հնագույն Վայս ամրոցի շրջակայքում: Նրա ավերակները հայտնի են Վեյսալի-կայասի անունով և գտնվում են Տանձիկ գյուղի մոտակայքում»: Բայաձորին արաբական զորքերի՝ դեպի Սյունիք կատարած արշավանքի ժամանակ հիշատակել է միայն Վայս ամրոցի զրավման մասին, հետևաբար, Բ.Հարությունյանի համոզմամբ, Սիսաջանի մասին Յակուտ ալ-Համավիի վկայությունը նույնպես վերաբերում է հիշյալ ամրոցին: Արաբները, ինչպես այնուհետև նշում է Բ.Հարությունյանը, ամրոցը Սիսաջան են կոչել կամ այդտեղ ապրող սյունեցիների (սիսականցիների), կամ նահանգի անունով: Վերջին ենթադրությունը նա համարում է առավել հավանական: Հոգուտ այդ տեղորոշման, Բ.Հարությունյանը կարևոր փաստարկ է համարում այն, որ Դվինից մինչև Վայս ամրոցը եղած հեռավորությունը կազմում է 90 - 92 կմ (կամ 16 արաբական փարսախ):

J. Markwart, *Das Itinerar von Artaxata nach Armastica*, Wien, 1928, S 28:

Սիսաջանը չի կարող նույնացվել Կիսաջանի հետ այն պարզ պատճառով, որ վերջինս տեղադրված էր Պարտավ-Դվին ճանապարհից դուրս: Բացի այդ, այս երկու կետերի՝ Դվինի և Կիսաջանի միջև եղած հեռավորությունը կազմում է 66 կմ, որը չի համապատասխանում արաբական 16 փարսախին, հետևաբար չի հաստատվում նաև արաբ հեղինակների տեղեկություններով:

Հ.Սանանդյան, Հայաստանի գլխավոր ճանապարհները ըստ Պեդրինգերյան քարտեզի, Ե., 1936, էջ 194 - 195:

¹⁰ Հ. Փափազյան, նշվ. աշխ., էջ 84, ծան. 64:

¹¹ Թ. Խ. Հակոբյան, Սյունիքի թագավորությունը, Ե., 1966, էջ 91 - 92:

¹² Բերդատեղին տեսել և նկարագրել են Ե.Հայկյանը և Բաջունին: Հետազոտվող հարցը լուսարանելիս Բ.Հարությունյանը հենվել է նրանց ուղեգրությունների վրա (տե՛ս Բ.Հարությունյան, Դվին-Պարտավ ճանապարհի Sisajon - Gelakuni գծամասը (ՊԲՀ, 1968, № 1, էջ 208, ծան. 50): Նշված վայրում տեղանքը Հետազոտելու ժամանակ ավերակների հետքեր չհայտնաբերվեցին:

¹³ Բ.Հարությունյան, նշվ. աշխ., էջ 217 - 218:

Դվին-Պարտավ ճանապարհի ուղղությունը քաջ հայտնի է: Այն անցնում էր Այունիքի Վայոց ձոր, Դեղարքունիք և Սոթք գավառներով: Եթե հիմք ընդունենք Դվինից Սիսաջան ընկած հեռավորությունը, ապա վերջինս թերևս պետք է փնտրել Տանձիկ գյուղի կամ Առփայի շրջակայքում: Սակայն դա չի համապատասխանում իրականությանը, քանի որ նշված վայրերում բացակայում են հնագույն քաղաքի ավերակները: Ընդ որում, հաստատապես կարող ենք ասել, որ այդ ճանապարհին գտնվող միակ հնագույն քաղաքը տեղադրված էր Շարուրի դաշտում, Վայոց ձոր գավառի մուտքի մոտ, Դվինից մոտ 75 կմ հեռավորության վրա: Ա.Այվազյանը այն համարել է աղբյուրներում վկայված Արբա բերդը, որի մասին գրում է. «Արբա բերդի ավերակները գտնվում են Նախիջևանի պատմական Շարուր... դաշտի Նորաշեն (Ուլյա Նորաշեն)... գյուղի մոտ, Արփա գետի աջ ափին: Այս բերդը կառուցված է Արփայի լեռնանցքի մուտքի առջև տարածված ընդարձակ հովտի հյուսիսային մասում վեր խոյացող չրջանաձև լեռնագագաթի վրա: Արբա բերդն իր գրաված դիրքով գտնվում էր Արաքսի հովտից դեպի Արփա գետի ավազանը բարձրացող կարևոր առևտրական տարանցիկ մայրուղիների նշանավոր հանգուցակետերի վրա: Դրա շնորհիվ Արբա բերդի հսկողության տակ են գտնվել Արփայի լեռնանցքը, Շարուրի դաշտի մեծ մասը, չրջակա բնակատեղիները և հին Հայաստանի առևտրական իրավունքների մի մասը: Լեռը, որի վրա կառուցված է Արբա բերդը, իր գագաթնամասում ունի մոտ 1 հա հարթ տարածություն, ուր ժամանակին եղել են միջնաբերդը և չրջապատող պարսպաշարքերը: Միջնաբերդից բացի այլևայլ շինությունների մի քանի տասնյակ (50 - 60) ավերակներ կան նաև լեռնագագաթի մյուս մասերում, որոնք ունեն քառանկյուն և ուղղանկյուն հատակագծեր:

Համեմատաբար լավ են պահպանվել Արբա բերդի պարիսպները: Այժմ պարիսպների պահպանված մասերը տեղ-տեղ ունեն 20 - 30 մ երկարություն և 1 - 2,5 մ բարձրություն: Արբայի պարիսպների հիմքերի քարերը ունեն 1,5 - 2,5 մ երկարություն և 1,5 մ միջին բարձրություն: Նման մեծ քարերով կառուցված պարիսպները ունեն անշաղախ շարվածք հարմար կապակցումներ: Բերդի պաշտպանության հուսալիությունը ապահովվել է

¹⁴ Նույն տեղում, էջ 214 - 218:

¹⁵ Առփա գյուղը գտնվում է այժմյան Արենիից 0,5 կմ դեպի արևմուտք: Այն «...եղել է թե՛ ճանապարհի հանգուցակետ և թե՛ Շարուրի դաշտից Վայոց ձոր մտնող կիրճը փակող ռազմական կետ: Այս պատճառներով էլ գյուղը չրջապատող բարձունքների վրա հնում շինված են եղել բերդ և ամրոց, որոնց միայն ավերակներն են մնացել» (Իվան Հայ վիմագրության, պրակ III, Ե., 1967, էջ 98): Անտարակույս «հին «Առփա»-ի ավերակները... ոչ թե սովորական գյուղի, այլ ավելի շուտ բերդապարիսպի տպավորություն են թողնում» (Թ. Խ. Հակոբյան, Նշվ. աշխ., էջ 91): Վերջինս իրավացիորեն նույնացվում է Արփայի հետ (Ս. Տ. Երեմյան, Հայաստանը ըստ Աշխարհացույցի, Ե., 1963, էջ 41):

Առփայից դեպի Ամաղու և Խաչիկ գյուղերը տանող ճանապարհի աջ կողմում, մոտավորապես 2 կմ հեռավորության վրա, երկու ձորերի միջև բարձրացող լեռան գագաթին եղել է բերդ, որի հետքերն են այժմ նշմարվում: Այդ նախկին ամրոցը նույնանում է Հրասեկա բերդի հետ՝ Նորավանքի հարևանությամբ գտնվելու պատճառով, որի մասին ակնարկում է Այունյաց պատմիչը. «Այս Թովհանէս յետ աւերման իւրոյ այնարհին, բազումս ալեկոծեալ այսր անդր, եկն ի Վայոց ձոր գաւառ և կամեցաւ բնակել ի խորածոր անապատին Նորավանից, մերձ անառիկ դղեկին Հրասեկայ բերդոյն, առ հիազօր եւ մեծասքանչ եկեղեցւոյն սրբոյ Կարապետին» (Պատմութիւն Նահանգին Սիսական, արարեալ Ստեփան - նոսի Օրբելեան արքեպիսկոպոսի Սիւնեաց, Թիֆլիս, 1910, էջ 348):

եռաշարք պարիսպների օգնությամբ, որոնց անկյունային հատվածներում եղել են որմնահեցեր և աշտարակներ: Արբայի շինարվեստի շատ կողմեր հիշեցնում են ուրարտական շինարվեստը, որը տակավին մ.թ.ա. 8 - 7-րդ դարերում վերակառուցվել է ուրարտական բերդերին հատուկ հատակագծով, որոնք պայմանավորված էին սոցիալական շերտավորվածությամբ: Այդ տեսակետից հետաքրքիր է բերդի երկմաս հատակագիծը: Միջնաբերդը չորս կողմից պաշտպանվել է պարիսպներով, որոնց փեշերին, լեռան ստորին լանջերում փռված են բուն բերդաքաղաքի բազմասենյակ շինությունները, որոնք ևս, իրենց հերթին, պաշտպանվել են պարսպաշարերով: Միջնաբերդի շինությունների իշխող տեղում, դեռևս 20-րդ դարի 30-ական թվականներին հայտնաբերվել են ճարտարապետական շինության խարխսխներ՝ անհերքելի ապացույցն այն բանի, որ միջնաբերդի իշխող հատվածում ժամանակին կառուցված է եղել պալատ կամ պաշտամունքային կոթող:

Արբա բերդի ավերակների շինարարական տեխնիկան վկայում է, որ այս բերդն իր նախնական ծնունդով կիկլոպյան չրջանի՝ մ.թ.ա. 2-րդ հազարամյակի վերջերի հուշարձան է, որը մոտավորապես մ.թ.ա. 8-րդ դարում վերակառուցվել է ուրարտացիների կողմից ու երկար ժամանակ ծառայել նրանց»¹⁸:

Ոչ մի փաստ չկա այն մասին, որ այս ավերակ բերդաքաղաքը Արբան (իմա՝ Արփանյալ) է: Վերջինիս տեղադրությունը ստույգ հայտնի է: Այդ մասին արդեն խոսվել է: Հարկ է նշել, որ բլուրը, ամրոցի մնացորդներով, այժմ կոչվում է Կարա-թեփե: Տեղանքի հետազոտությունը ցույց է տալիս, որ հատկապես լավ պահպանվել են հարավ-արևմտյան, հարավային և հյուսիս-արևելյան հատվածների պարիսպները: Առավել պարզ արտահայտված է հարավ-արևմտյան հատվածը: Այն բաղկացած է 2 կիսաշրջանաձև աշտարակներից, որոնք միացված են պատերին ուղղահայաց հատվածներով: Աշտարակների միջև եղած պարիսպների կտրվածքը անկյուն է կազմում: Պարիսպները, որոնք կազմում են աշտարակների շարունակությունը հյուսիսում և հարավ-արևելյան հատվածներում, չրջափակում են լանջի այդ հատվածը:

Ներքին աշտարակի պատերը, բեկման անկյունի հետ միացված են եղել մեկ այլ պատի, որի հետքերը պահպանվել են մինչև 180 մ երկարությամբ: Աշտարակները կառուցվել են կրկնակի չրջանաձև պատերով, որոնց միջև եղած միջին հեռավորությունը կազմել է 2,5 մ:

Աշտարակների արտաքին պատերը կառուցված են եղել բազալտե հսկայական զանգվածներից (միջին չափերը $2 \times 1,1$ մ, իսկ հաստությունը 2,17 մ): Պահպանված պատերի առավելագույն բարձրությունը 3,5 մ է: Աշտարակների արտաքին և ներքին պատերը շարված են առանց չաղախի՝ տաշված քարերով: Աշտարակների շարունակությունը կազմող պատերը քարե փոքր զանգվածներ են՝ շարված նույն սկզբունքով: Աշտարակներն ու պատերը կառուցված են տեղանքի առանձնահատկությունը հաշվի առնելով: Ուսումնասիրված կառույցների ամբողջ պատերի ընդհանուր երկարությունը 77,5 մ է:

Պարիսպների հետքեր են պահպանվել բլրի ինչպես հարավ-արևելյան հատվածի մասերում, այնպես էլ գագաթի մոտակա տարածքում: Հյուսիս-

¹⁸ Ա. Այվազյան, Նախիջևանի պատմաճարտարապետական հուշարձանները, Ե., 1978, էջ 63 - 64:

արևելյան վերին աշտարակից 5 մ հեռավորության վրա պահպանված է շինություն մի անկյուն և պարսպի մի հատված՝ նույն շարվածքով²⁷:

Կարծում ենք, որ Կարա-թեփե բլրի վրա տեղադրված հնագույն բերդաքաղաքը Մարակերտն է, որի հիմնադրումը, ըստ Գողթան երգիչների, վերագրվում է Արտավազդին՝ Հայոց Արտաշես 1-ին թագավորի որդուն: Մովսես Խորենացին այդ մասին գրում է. «Այլ և Արտավազդայ ոչ գտեալ, ասեն, քաջի որդւոյն Արտաշիսի, տեղեկիկ Ապարանից ի հիմնանալն Արտաշատու՝ նա անց, ասէ, զնաց և շինեաց ի մէջ Մարաց զՄարակերտ, որ է դաշտին՝ որ անուանեալ կոչի Շարուրայ»²⁸: Ասվածի հաստատումը գտնում ենք «Աշխարհացոյցում», որտեղ տրված է Մարակերտ-Մարավանի տեղագրության ճշգրիտ նկարագրությունը. «Շարուր դաշտն, ընդ որ հոսի գետն Արփանեալն, առ Մարաւանայ քաղաքով, անցանելով ի հարաւ՝ խառնի յԾրասիս»²⁹:

Ամփոփելով բերված նյութը՝ կարելի է արձանագրել այն փաստը, որ արաբ հեղինակները Միսաջան են անվանել Սյունիքի մերձակա տարածքում՝ Շարուրի դաշտում, կառուցված Մարակերտ կամ Մարավան քաղաքը՝ իր տեղագրության պատճառով: Ընդ որում, Միսաջան-Մարավանի և Դվինի միջև եղած հեռավորությունը (ուղիղ գծով 75 կմ) կարող է համապատասխանել 16 արաբական փարսախ կազմող բնական ճանապարհին: Միսաջանի աշխարհագրական դիրքը բացառում է նրա պատկանելությունը Սյունիքին: Սակայն, հիմնվելով Հուգուդ ալ-Ալամի նշված տեղեկության վրա՝ Հ.Փափազյանը հայտնել է այն կարծիքը, թե «խոսքը Սյունյաց գահերեց իշխան Սմբատի մասին է, որը 970թ. թագավոր էր օժվել, և նրա թագավորությունը ճանաչվել էր Սամանիդյան թագավոր Նուհ-իբն Նասրի կողմից»³⁰: Այս պատկերացումը մտորումների տեղիք է տալիս, նախ՝ Սյունիքի թագավորության հիմնադրման տարեթվի շուրջ՝ կան տարակարծություններ³¹: Առայժմ ընդունելի է համարվում 987թ.: Այդ տարեթիվը հիմք ընդունելու դեպքում ժխտվում է հիշյալ տեսակետը, քանի որ Հուգուդ ալ-Ալամի հեղինակը իր աշխատությունը սկսել էր գրել 982թ.³², երբ Սյունյաց գահերեց իշխան Սմբատը դեռևս չէր օժվել թագավոր: Անկախ այդ հանգամանքից, տարածքային պատկանելության առումով, որքան հայտնի է, Սյունյաց Սմբատ թագավորի տիրույթների կազմում Շարուրի դաշտը ընդգրկված չի եղել: Սկզբնապես Սյունիքի թագավորության սահմաններից դուրս էին մնացել Գեղամա լճի շուրջը գտնվող գավառները, իսկ հետագայում՝ նաև Վայոց ձորն ու չրճակ գավառները, որոնք գրավվել էին Սմբատ II Բագրատունու (977 - 990) և Գագիկ I-ի (990 - 1020) օրոք:

²⁷ Տեղանքի հետազոտությունը կատարել ենք ճարտարապետ Արա Զարյանի հետ: Գտածո նյութերը, հիմնականում խեցեղենի բեկորներ, ըստ հնագետ Հ.Ավետիսյանի, վերաբերում են Վանի թագավորության ժամանակաշրջանին և IX-XII դդ.:

²⁸ Մովսեսի Խորենացու Պատմութիւն Հայոց, Տփղիս, 1913, էջ 84:

²⁹ Ս.Տ. Երեմյան, նշվ. աշխ., էջ 111: Հարցի վերաբերյալ առաջին անգամ արտահայտվել է Ս.Տ. Երեմյանը: Նա գտնում է, որ Մարավանը «պիտի փնտրել այժմյան Նորաջենի տեղում» (նույն տեղում, էջ 65):

³⁰ Հ. Փափազյան, նշվ. աշխ., էջ 85, ծան. 65:

³¹ Սանրաման տե՛ս Բ. Հարությունյան, Սյունյաց թագավորության հիմնադրման տարեթվի հարցի շուրջը (Բանբեր Երևանի համալսարանի, 1969, № 1, էջ 145 - 153):

³² Հայ Ժողովրդի պատմություն, հ. III, Ե., 1976, էջ 114 - 116:

²³ Հ. Փափազյան, նշվ. աշխ., էջ 73:

Պատմիչի հավաստմամբ, Գագիկ I Բագրատունին «տիրեաց յոլով բերդից և գաւառաց ի սահմանաց Վայոց ձորոյ, Խաչենոյ և Փառխոսոյ առանել քան զեղբայր իւր»²⁴։ Որոշ տվյալներից երևում է, որ Բագրատունիների վերահսկողության տակ էին անցել նաև Սյունիքի Ծղուկք, Հաբանդ, Աղահեճք գավառները։ Հետևաբար, հավանական է, որ Հուդուդ ալ-Ալամի տեղեկությունը վերաբերում է ոչ թե Սյունյաց Սմբատ թագավորին, այլ Սմբատ II Բագրատունուն։

Նախկորգան - Վաղ միջնադարյան Սյունիքի ոչ այնքան հայտնի քաղաքներից է։ Տեղական ավանդության համաձայն, նրա հիմնադրումը վերագրվում է Սյունյաց Անդոկ իշխանի որդի Բաբիկին։ Ըստ սկզբնաղբյուրի, Անդոկը, նվաստացած պարսից Շապուհ թագավորից, որ արքունիքում խնջույքի ժամանակ իրեն հատկացվել է 14-րդ տեղը, որոշում է վրեժխնդիր լինել։ Խաղաղության դեմ պատերազմի ժամանակ, պարսից արքային օգնելու պատրվակով, նա 1700 հեծյալներով ժամանում է Տիգրան։ Ըր ղորքը թողնելով դարանում նա փոքրաթիվ ջոկատով մտնում է քաղաք, ուր նրան դիմավորում են մեծ շուքով։ Գիշերը Անդոկը իր զորքերին գաղտնի նշան է տալիս։ Արևածագին, քաղաքի դարպասները բացվելուն պես, զորքը խուժում է ներս և ավարի ենթարկում քաղաքը։ Վերադառնալով Սյունիք՝ իշխանը ամրանում է Բաղաբերդում, որը շուտով պաշարվում է պարսիկների կողմից։ Սակայն, չկարողանալով գրավել Բաղաբերդը, նրանք սկսում են կողոպտել ու ավերել Սյունիքի գավառները։ Անդոկ իշխանը, հարմար պահ գտնելով, թողնում է բերդը և մեկնում Բյուզանդիա։ Անդոկի մահից հետո նրա որդին՝ Բաբիկը, անցնում է ծառայության Շապուհ արքայի մոտ՝ ուրիշի անվան տակ։ Շուտով նա հռչակվում է իր խիզախության մասին։ Հոների հետ պատերազմի ժամանակ Բաբիկը մենամարտի է բռնվում նրանց առաջնորդ Հոնագուրի հետ և հաղթում նրան։ Դրա դիմաց պարսից թագավորը վերադարձնում է նրան իր նախնիների ժառանգությունը՝ Սյունիքը։ Անդրադառնալով այդ իրողությանը՝ Մովսես Կաղանկատվացին տալիս է Նախկորգան տեղանվան իր մեկնաբանությունը. «Եւ եկեալ էանց ընդ Երասխ գետ և չինեալ զգեօղ մի Նակորդ անուն, այսինքն է առաջին կորգեալ

²⁴ Տիեզերական պատմութիւն Ստեփաննոս վարդապետի Տարօնեցւոյ, Փարիզ, 1859, էջ 256։

Թ. Խ. Հակոբյան, Նշվ. աշխ., էջ 61 - 63։

²⁵ Մովսիսի Կաղանկատվացւոյ Պատմութիւն Աղուանից աշխարհի, Մ., 1860, էջ 82 - 85։ Ըստ Փավստոս Բուզանդի, Բաբիկ Սյունին տոհմական տիրույթը ստացել էր Մանվել Մամիկոնյանի ձեռքից՝ Հայաստանում վերջինիս կառավարման չրջանում (378 - 384թթ.), «եկին ապա և մնացորդք ի տանէն Սիւնեաց զատանեակ երեք մնացեալք ի կոտորածէն Պարսից առ զօրավարն Հայոց Մանուէլ և անուանք Նոցա միւսումն Բաբիկ և միւսումն Սամ, միւսումն Վաղինակ։ Եւ ընկալաւ զնոսա զօրավարն Հայոց Մանուէլ. եւ եղև Նոցա օգնական, և դարձ արար Նոցա յերկիրն իւրեանց և կացոյց տէր Բաբիկ ի վերայ երկրիս, և զերկուսն ևս ըստ իւրաքանչիւր չափու, և էր Բաբիկ նիզակակից զամենայն աւուրս կենաց նորա (Փաւստոսի Բուզանդացւոյ Պատմութիւն Հայոց, Վենետիկ, 1832, էջ 250)։ Պատմիչը հաղորդում է նաև, որ դավաճան Մերուժան Արծրունու առաջնորդությամբ Հայաստան ներխուժած պարսկական զորքերի հետ Բագավանի մոտ տեղի ունեցած ճակատամարտում «... Բաբիկ տէր գաւառին Սիւնեաց Հասանէր նիզակաւ ի վերուստ ի վայր ի կողին կարէր ընդ դէտին, և ոչ կարէր յառնել (Մերուժանը - Ա.Ղ.)։ Իսկ զօրապետն Մանուէլ իւր վարաւանդապատքն յերկարն հանէին, և զՄերուժանայ զգլուխն ի բաց հատանէին (նույն տեղում, էջ 254)։

ի Հայրենեաց»²⁷: Նույնը Հաղորդում է նաև Ստեփաննոս Օրբելյանը. «...Եւ անցեալ ընդ Երասխ գետ՝ շինէ գեղաքաղաք մի կոչելով զանուն տեղւոյն Նախկորդան, որ թարգմանի նախ զնա կորզեալ առ յինքն յիւր Հայրենեաց»²⁸:

Երկու պատմիչների վկայությունները ուշագրավ են նրանով, որ պարզություն են մտցնում Նախկորդանի տեղադրության Հարցում. Երասխի ձախ ափին՝ պատմական Սյունիքի տարածքում, այնտեղ, ուր գտնվում էր գետանցը, որի մոտ Հիմնվել էր քաղաքը: Պետք է նշել, որ X դ. Տաթևի վանքի Հարկատու գլուղների Հին ցուցակում Նախկորդանը վկայված է Քաշունիք գավառում²⁹: Տվյալ Հանգամանքը ավելի որոշակի է դարձնում նրա տեղորոշումը: Այդ կապակցությամբ Հատկապես կարևոր է «Աշխարհացոյց»-ի ցուցումը, որը Սյունիքի տաճարները գավառների թվարկումից Հետո ավարտվում է Հետևյալ խոսքերով. «...մինչև ցնախկորդան քաղաք, անցն իւր ... Աղաւնոյ գետ»³⁰:

Համադրելով բերված տեղեկությունները՝ Հանգում ենք այն եզրակացության, որ քաղաքը տեղադրված էր Երասխի ձախ ափին՝ Սյունիքի Քաշունիք գավառի տարածքում, նահանգի արևելյան սահմանը Հանդիսացող Աղավնո գետի ստորին հոսանքի հովտում³¹:

Հարցի վերջնական պատասխանը գտնում ենք Ստեփաննոս Օրբելյանի «Պատմություն» Հետևյալ տողում. «...ըջանա գետոյն Աղաւնոյ, Հանդեպ եկեղեցւոյն Նախկորդանում...»³²:

Այսպիսով, ակնհայտ է դառնում, որ Նախկորդանը տեղադրված էր Աղավնո գետի աջակողմյան մասում, գետաբերանի մոտ, ուր մինչև Արաքս թափվելը, այն, աղեղ գծելով, առաջացնում է բազմաթիվ գալարներ: Ոչ հեռու անցյալում այստեղ եղել է Շարիֆան անունով բնակավայր, որը Համապատասխանում է Նախկորդանին: Շարիֆանից արևելք Աղավնո գետանցն է, որը ձգվում է մինչև Արաքսի ինավալիսյան ծանծաղուտը:

Արաքս գետի վրա Հիդրոհանգույցի շինարարության կապակցությամբ 1980թ. Ադրբ. ԽՍՀ ԳԱ Պատմության ինստիտուտի արչավախումբը հետազոտել է քաղաքատեղին: Հուշարձանի սահմանները ճշտելու և շերտագրությունը որոշելու նպատակով արվել են երկու փորվածք և բացվել մի քանի Հետախուզահոր: Պարզվել է, որ մշակութային շերտի հաստությունը կազմել է 2.00 - 2.75 մ: Հայտնաբերվել են մետաղամշակման արտադրության մնացորդներ (թուջերկաթներ, երկաթե առարկաներ), խեցեղեն, ապակե

²⁷ Մովսիսի Կաղանկատուացւոյ Պատմութիւն, էջ 85:

²⁸ Ստեփաննոս Օրբելյան, էջ 40:

²⁹ Նույն տեղում, էջ 519:

³⁰ Աշխարհացոյց Մովսիսի Խորենացւոյ յավելածովք նախնեաց, Վենետիկ, 1881, էջ 33:

³¹ Ս. Երեմյանը Հայտնել է այն կարծիքը, որ «Պիտի գտնվելը Երասխ գետի ձախ ափին ինուդափեոթիների կամուրջի մոտ: Այս կամուրջի վրայով ճանապարհը գնում էր լեռնային դժվարին տեղանքով (Համալայա՛հ Հազվիլին կոչում է Arminian), իջնում դեպի Ահար քաղաք, այնտեղից դեպի Թավրիզ և Արդաբիլ» (Ս. Տ. Երեմյան, Հայաստանը ըստ «Աշխարհացոյց»-ի էջ 72):

Առաջարկված տեղորոշումը անընդունելի է, քանի որ այդ դեպքում Նախկորդանը Հայտնվելու է Սյունիքին հարող տարածքում՝ Արցախում, մինչդեռ ըստ սկզբնաղբյուրների, այն անմիջականորեն գտնվել է Սյունիքում:

Ստեփաննոս Օրբելյան, էջ 86:

³² См. Карта Елизаветпольской губернии, 1906.

իրեր, իրանական և չինական ծագում ունեցող ամանեղենի կտորներ, XVII դ. պղնձե դրամ: Քաղաքատեղին կանխապես թվագրվել է XIII - XVII դդ.³⁴

МЕСТОПОЛОЖЕНИЕ ГОРОДОВ СИСАДЖАН И НАХКОРЗАН

А. А. КАРАГЕЗЯН

Резюме

В арабских источниках содержатся интересные сведения о городе Сисаджан (арм. Сисакан). Это был один из пунктов дороги, ведущей из Партава в Двин, на расстоянии 16 фарсахов от Двина. Изыскания по определению местоположения Сисаджана показывают, что арабские авторы Сисаджаном называли город Маракерт-Мараван, расположенный в Шарурской равнине, у самого въезда в гавар Вайоцзор провинции Скуник Великой Армении. Город Нахкорзан относится к числу малоизвестных нам городов Армении раннего средневековья. По местной традиции основание города приписывается Бабику, сыну скуникского князя Андюка. В историко-географическом отношении определение местоположения Нахкорзана имеет особое значение, поскольку в "Армянской географии" он отмечен как ориентир для указания восточной границы провинции Скуник. Установлено, что Нахкорзан был расположен у устья р. Акера (Ахавно), в правобережной части, там, где до впадения в Аракс Акера образует многочисленные извилистые протоки.

³⁴ Г. М. Ахмедов, *Работы Худадеринской экспедиции*, (Археологические открытия 1980 г., М., 1981, с. 415).